


Blira sareon gu Abdiizvugal





Xeka va ayik towasir

Va int bak muvugal gestil. Moo gozasa keldanya lanil. Kerafe is ebeltafe tcalute va rinafa gestara vluped nume laneckel da koe aala me di eglul. Pestel kalaf, musedon. Wori keldafa regalama va rin me nendoyed... Vukuda va rin bakar kiren tan uul kaiknir. Tite bata wikanda, konake wikande tid. Sinaf cot tir gedelaf voxen va kulduk gonempal. Pizauxa ke xala ke eyelt dimlicawer nume dratcer da en fu nyuwer. Bexe til djastaf is wergus. Anamdisukeson, va lani dri kosmar, i va dri pwertafi dum kramtenye. Kas ervayafa myelga rinton olegana me tir ? Kan abic madjaf is oblik vord (va gelt obral !!), rotexaf uul zo selur azen wikande zo fenkud azen pizauxa zo titaplasticir. Bat myelgadri sotir taneafa xeka ke xantumaf ayik.


Grupeik is rawopik is ayopik flided ise dile mijed enide gruped ba tok gemeltack bak abrotcifa ayastuva, va Ayik tere ropulvit. Ayik mali xeka krulder ! Vielu tisik va kona xeka olegayar aze kotviele faveyer, dum rin sure, pune vanpiyir *Homo habilis* ayik oku *Homo faber*. Ana taneafa xeka weti toloya ok baroya ok balemoya ok dace aluboya celemda, to tickir rilafe ye inon tredune. Koni dri gickini koe nuba is dralafi gu kota favera, i gu nyofara va ari raporki ok intaki ik empara va wikande ik selura va enga ik arbera va kuldoy... Kotafa ayafa raba va bati dri malfir, i va bata taneafa xeka tukiewatana is senutuna gan *Australopithecus* ayik. Treduson va bate ye, *Australopithecus* ayik va enekef djobal ixam egayar.

Tegis tculk vamo Serengeti azeka koe ronefa Afrika tigid. Taneaf *Homo habilis* ayik va nokol laited aze kan raporki aytad, i va sebadadunolam lumaf dum bilotol. Vrek is kirka kum gama va yasa ixam bravad ise nedad.






Homo habilis ayik ontinaf gu 1.40 m-, va rilafi dri tid pwertarsafi is gamiarsafi gu nubara is medrikafi gu gira dile flesur. Kevkabuson va dripi gu pistaf sid, va ini arber nume va yoni ki dem gabesa stona malseotar.




Dri sotir tamefa xeka mu *Australopithecus* ayik azu *Homo habilis*. Va kotcoba zanudar : ta rojura ik tcabanera, is ta arbera va wageye kayestane moe piluda. Oc va wageyeda ulid. Krimta va rob ke siday isu bira firvir.

Ayik is sulem sotid vuwaf : va mil kayestaks blidad. Batlize lan *Homo habilis* ayik va rozokoltum gu bilke lyumar. Malplatitison, inaf dositik kev jidol va dri kabud. Xeka vanpir kabuxa.



Deinotherium vezfuzol kimon ice meila is aala su awalker. Atela tori konaka safta tir ! Walzeyenon gan turci anametalasi vamoe awalkoda, *Homo habilis* ayik su artlanid. Va sulem kan roidasiyini dri basalmad.

India welfa va sutcaf kuldoj moe piluda divgir. Ton ware loribiegaf yal, to bat granaf odayol xeyeyes tir. Celkatason, *Australopithecus* ayik va kuld dem remgabesa doma faved. Sin tid tana taneafa xeka !



Kaba kum inta is brind kum frukti



Mal dri nokodayani kev raporka num roidayas, kal gaba disa va dovoraf is gotuyun tazuk, yona vuntda al tiskid. Bata lugavafa viuca ke ckanefa abduxoa zo rodiver. *Australopithecus* ayik azu *Homo habilis* azu *Homo erectus* (*Pithecanthropus* is *Sinanthropus* is *Mauer* ayik...) abicote tid tcastapaf koe tamava. Riaf tum dem abic olkik tid bumaf arte divatcepe. Blira tir wupesa is trelafa. Ckanefa djasta ta lokiewafa tcabanera is deksaca ta divgaberanya va fruktiki medrikon zo remzilid. Kas ayik grupulvir enide lokiewon grugoler ise ropebur ? Dikeke ta tavera pu milkatcik ok «jotik». Batdume durefa az girefa gandura nope meamuzera dun tid adrafa. Vayara va bat lekeugal nover da va zolonuca ke avot num inafa tavera lokiewon vangrupet. Tukeon, ayik tatcer da mal nede dun goginuyur.

Weti celemda, bata rindera va lani fruktiki ta nyofaranya ixam tir welkafi neki ke enekefa motaelara ke ayik. *Homo erectus* ayik va bata elega al narar aze fuxetolon al nokodar, lumon ice intafa nubama (intafe rane anton tir vas 1.50 m-). Tokinde va bati ki fu divgaber enide va olegana gabexa is rokonubana ekwa di malseotor ?

Enide divgabena elega di vanpir tulon soyorekorafa gabacka, pune konaka vuntda gotitid. Tere, arti yon adref greelt (yoltayan gu *Olduvai* sare azu *Abbeville* azu *Clacton* azu *Acheul* azk-) gan abdiizvopik, ayik va kotunafa gaba malseotor, i va azekafa is glabafa gaba dem gemaf ilbodeks : soyorekoraca keskotafa is gaelmumimafa. *Homo erectus* ayik va bata trumafa divgabera puvejur. Yambudik vanpir yambik.

Muva va ecor ke Olduvai koe ronefa Afrika wan konipir. Troskol va int ulidinad. *Homo erectus* ayik gruped kane va sin katasid. Uleon va ugota kayestad. Toloy va gamiafi dri celkad... (*Nakila ke toloyu bu va Homo erectus atoed.*)




Fruktifa elega toz zo tazukar. Kan yon oblif is adref vord, lana gabexa toz awir. Elega fu vanpir soyorekorafa gaba yoltkirafa gu brind tis « tamefa » xeka dakisa va nuba is rodetazesha ik roselusa ik rotabovesa...



Weda va ayik is sulem vanimpar. Moukolap banliz sielon ulidinad. Ayik gruped nume pitcad. Kan teyayana gama is kizoyura is abrotcafa kaba dratcesa, va bat granaf govitol kovudar numaze van weda platir.

Troskol mo sid su zo impar. Basalmara zo tozur. Kan mantafa fruktifa roida, tcabanesik va bat sulemap basalmad. Va mantafi cotki malgabed. Talteon lantan va almaki iliksantud. Atela mo luwin tey solzawer. Remi abrotcifa safta, greelt va intafo « cotxo » rosaveter. Kaba kum inta is brind kum fructi va kogestusa enja ilfir.



Myelgapa kum rapor va gjaf is suyaf ilbodeks daskir. Kan drim kum inta, yambudik va pinaf is azekaf ilbodeks volson malseotar. Va brind tuvertar, va poaf tazuk daskir. Jotik kalsuked... nume raved.



Gamiaf govitol adre kodiblawer. Ton tanoya empayana inia, troskol kotit drem vion flaydur. *Homo erectus* ayik vanlanid, va kaba kougad liz rotaskid, ko fenkuyuna gariza, ko ita, ko eliwa...





Tey ke kelt

Raymond Dart bak 1924 va taneaf *Australopithecus* ayik koe raporxo ke Taung koe refa Botswana ke Geefa Afrika kosmayar. Bak 1947 va konaki warzafi yupki koe Makapansgat koe Transvaal gola kayestar. Bat yupolk tiyid otson tuebeltayan. Kas tiyid niska tcalayana gan tey ? Gan tey weti tol-celemda ok bar-celemda ! Kas bat *Australopithecus* ayik gu ambik co zo rotorigiyir ? Ovopon : ayik = tey ise volon. Adim tere me. Niska gan valo ke azil zo tuebeltayad. Tire levrotira va tey kaikion dilizeyer, weti mon alub-vuntda (sedme ref sok ke minafa grupera isu kosmara). Kosmara va tey azu malsavera isu videra azu kevseotara tid jontik greelt wavdon rosoltrakun. Delafi rawopafi vargi wan tid riapafi.

Vamoion dene *Neandertal* ayik, va teyak dem derackafe raporafe anambe is guboy bene niskaki gedeyayani gan tey is anteyayani fruktiki trasit.

Taneaf tey va tuwava somalstir. Mayesis tey govanlanin enide zo rofelir. Warzera va tey di tir pelkaf kosmaks. A tey, europafa ruga ke yon oprugal me co zo frofayar.

Batugale, losavsaf grupen teyak tid guazaf vas 500 000 tanda, koe Vertesszolos koe Magyara. Tid ke *Homo erectus* ayik (tanoy takom vanmiae senuyuni dri zo trasiyir).



Xefto va meila koafiar. Werdap lokalion dam granafa galketa burmewed. Putcol is uzekol is kustrol otced. Voxis ayik kuncasin gan dagafa vultera. Abicedje undeteson is lasunaruson vukid. En tid ayik. (Nakila ke toloyu bu va *Homo erectus* atoed.)




Teyka su remostid aze grunkaweyed. Koe apkayana meila, ayikya is rumeik va awalkoda ke pustayan putcol koe anteyayan werd kosmad. Cotki drikon a gabesi dri zo iliksantud. Sulem va warzafa minta dir. Baroy *Homo erectus* ayik va gama luxeon konarid, i va gama lize beneon teyka wan vulted. Bat pestalen idul is « awalt » gin arte ma tid divulaf, i awalt zekawes is vumbes az vilas va gama...

Yazidaf soist va Sandiman tculk isu Arusha isu Kilimanjaro divnipid, is va kotar runkaf tculk ke tamava. Kottan otcer. Lanviele ayik va gama kev bat teybost koafayar. Va kimi dubier. Tey me ayik va gama kev bat teybost koafayar. Va kimi dubier. Tey me ayik va gama kev bat teybost koafayar. Va kimi dubier. Tey me ayik va gama kev bat teybost koafayar. Va kimi dubier.

Aalafa meila sumeon anteyawer, firdeyena gan gleba. Ayik va anamkafa kirka bulud aze va venta vanticlanid, dizveson va disukexa. Taneakaf ayik sotir rilitaf. Grupera is opa kan rilituca zo tozud.



« Idulafa » gama ke awalt va agafa gama zilina ton sinka vumbed. Ayik va zae is cot ke wivga malestur. Gama gan teyka dere zo estud. Meila al tenanteyawer voxen « tey » wan blir.






Levrotira va tey

« Kiewafi seri » tid, i tulon *Tichorinus* beicekol ordaf gu fentafa lidawicka. « Rotafi seri » luxeon tir ordafi gu mecoba : koe idulxo lidam fentxo blir, koe azeka lidam meftava, koe meila lidam aala. Diepilet, teli lorotafi seri enwe tir ayik. Voxen ayafa katca va ara kira sodir, i va kira lozolonapafa : va po ke tuwava grufelir ise mu int tukwar. Satcon tey tiyir, weti 500 000 tanda. Taneon tir govitaf is nekiyis mal gleba ik yazidafa traspuxa, adre gan ayik zo vider ise zo stujer. Tokinde ayikya vanpir susik ? Kas tana va bati idulafi is koafisi awaltki gorubar ise gogublisar ? Tey tir po ta burmera va atela is treduyune zae. Voxen drume bata teyka kabelcasa va staba, ayik raver ise rabater ise dizver... Teyka va bati gamaki ton akricu dum rapor al tuolgar. Teyka ke ironokaf fird va sulemeem don telyon locrakef al kovudar.

Jontikedje tiys bulaf is eaftaf remi yona decidda, tey va radeya az maya az opelafa vuda nekiyir. Moni teveafa ik alubeafa kunda, tey tuyastawer ise zo grinuyar aze oleganon rotir zo giwarzer, nume ta kumaskira va ayik banvielu zo malsaver. Vanpir pelaca is dace rojuxa ke tcabanesik.

Pilkomodayat da *Neandertal* ayik va ayackaf adaleem sodiyir. In va awalkik gikotawayar. Va taneafa migra reduyur. Va seltafa voda pu ebava kristeyer.

Poke teyak is solzaks bene fokev tis kwafa malsavera va tey, bat guazaf yambudik (*Homo erectus* ayik) klaaf gu bar-sanda ok balem-sanda, va akrikuotsa ok kabotsa kev reliez tuolgar, i va otsa nyofayana kan fruktifi abovesiki.



Blira ba miel ke meila me nonuwer. Sulem va ujiwa ok kuksa ultison kallanid. Digdatol mwared. Krapoldunol tcabaned, anjeson va loras werdap. Tilerda gan *Homo erectus* zo ploted nume va snavol otcesid.

Tuke tukwayan tey, Neandertal ayik remi olgapafa lidawicka ke ironokaf oprugal roderembluir ugale ruga is *taiga* aala xultuyud. Tey arte wexukirafa tilerda zo gestar nume va aneyara va brava ko tapedafa arula nover. Dile ayik va elicik kakever ! Va bata rupolya is jotaf oceem, tulon. Ina gan tilerda zo tuwiiskar aze gan intafu akricu tuolgayanu kan tey zo remrur nume ten zertur. Tcabanesisik gan inafa gijarotifa inia me zo rotuzad, lyumara tire tir memiltafa.



Vanawalt ok nom ? Teniskafi dili mo abica anamkafa kirka ke *Homo erectus* ayik divlizer. Susik va teyakeem aname kenibesa wida kiewagir.



Kabdue kiria dem arula, Neandertal ayik va tcabanerinda prilad. Geaki ke avot va mogolera nover. Abrotcafa kaba tid gadifafa. Tilerda zo koteyar isen burezik kan gelt va ota dem rupol patar.





Rob ke tuwava

« Tokkane a beta xeka roblit ise rolaitet ? Remi yona vuntda, veyayik az ayik soe vaon lajufianded. Weti abica sanda, Mary Leakey koe Tanzania va toloya rilafa nela kum rapor trasiyina koe Laetoli nediyir. Banlize moe tculkafo guboyxo evlon gu 3500 000 tanda, va koinga ke *Australopithecus* veyayik dositasa va telyona ke putcol isu *Dinotherium* veyfuzol al kosmayar. Bata nela gan nuba ke ayik me zo divgabeyed : tiyid « tuwavafa ». Bantode kas ambik ke *Homo faber* ayik va xeka men grupeyer ? Malaskison va tula ke anamedaf sulem, *Australopithecus* katcik is *Homo habilis* ayik va kotcoba rodafuna gan tuwava treduyud ise kayestayad ise vestayad...

Dinotherium veyfuzol kan titlivaf talgaveem joxayar ise va tawa treyer enide va zae divtawayar. Pinaf lagomyx dunol va balikeks dace tadleyer ! Warolara va govitaf ilt is tredura va kuld is aklera va yoni atelaki kev digdatol ik fliwafi zveri, belcon tiyid rob mu taneaf ayik. Bantan koe siudasa is viakusa anameda dem sulemafi is ruxafi bli ware abicote tiyid nume nope ael me awalkeyed. Kabdion rovodizveyet da tuke san-lerdoy warolas viel, lan Hottentot saneik irubas cane Kalahari letaxo decemkon rolapteyed ! Bat greltik me aelawalked. Sinafa vieleafa malestusa vertuma tir vas 2140 kaloria. Dolunenon, koe taltefa Europa, kon milgik mialukaf gu klaa is aldo va 2200 kaloria raweyackar !

Koe danmarkafa weda ke Maglemose moni -7000 AGJ-, ayik moe drimazekos blid. Kirka koe aala gu cirdatraf almuk zo besad. Valey onara, kuldoj cugote zo warolad. (Va otsa ke granafa ezba dem kuld rowit. Bata tir *kjokkenmodding*).



Lotaneakafa kayestara tid va ilt is voja is paluk is zae. Batlize ayikya va sebadadunolam anameon vultes dizved. Bat *lagomyx* sulem va zae dere albadap ise va balikeks ko tawaz tori cadimaj beded. Kan uulkirafi intaki, i kan krevanto tiso taneafa xeka ta nyofara va tawa, *Homo erectus* ayik va tawaz tsaxad aze va zae kabelcayane gan sebadadunol tredud.

Kayestara va tuwavaf webektumap tir wemtafa, moni -5000 AGJ-. Colk leve ksent kan teca bupra zo gabed, i kan opelafa ridja kum inta dem kougayani talgakorafi fruktiki. Iliksantutuson va olk, ayikya va colk kev mebast basfayar.

Krimtaf rob tid akenaf. Voxen rawopafa wazdexa tid riafa kiren domega direkeon jontiktode ataleweyed. Bat kayestasik ke Asturias gola kene krimta ke Atlantika welfa moni -6000 AGJ- va *Patella* kuldoy kan istorafa skuma iliksantud.



Kota coyunta va aptolafa yestara sopur. Weti 3000 tanda, krimtik ke Balta bira moe piluda, va eribaki dem jemakafa tcaza ta epura va marda is flek kayestad. Gu elega kum kawodaf eip alban gan bonoltum moorted. Bata elega male Karpatos jakat tid. Meftavik kan guema katit Wisla bost vaon al rembured. Va eriba ika eip ! Moortera tir merizera va kaza rovodikadigisa va warzexs. Batlize, va tapega ika favlaca...





Sulem iksen

Deolon lanison, *Australopithecus* vuwayik is *Homo habilis* ayik va awalkaf sulem kosmad. Batkane sinkarud, mali ruxatorafa malestusa vertuma ke aala kali tela blottorafa ke meila. Bana soe ware tir kayestara lodam ageltucafa tcabanera.


Elupkafa uzerara va tuwava is sulemafa tamava kalion nedir da lana gola tid zeitafa gu onkara va wivga. Icde sulem lidam ayik, walta rosokid : jontikviele me xonukesid voxé fereon tuyalestad. Tulon weda va dempa nekid, dum moe azekexa ke Vieja Castilla koe Torralba ik Ambrona. Fuzol ultison lanid voxé koon flaydud. Aldo ke bat moukolap tir vas aluboy decitor ! Numen in va int me lajugrifuner. Ayik va mana tuyalestara dere ronekir ; kan kizoyu, kan tilerda is akricu, va gamiaf gulol kovudad ise van weda doimpad !

Moe kadoma ke kalkafa azekexa, sulem ticus kiria iped, volins empason va inia. Ar ko groya griawid. Koe lan dwist vamoe arula ke « *Baroy berik* » koe Ariège gola ke refa Franca, tanoy gartolap isu bedakol isu idatcol is yon bresitol is konak jotaf rupol is tanoy narmol isu manyevol ko titsuyaфа arula lubed ise me royated. Batmane ikse gan ayik zo kaaneyayad nume dace zo askedayad. Iksesa tcabanera va gjafa tegisa tcabanera abdifir. Voxé va donafa sugara ixam levaykar. Laiteteson va kon sulem ok kaikion suxatason va kela isu egatason, konaktan gotid. Ede olkik tir bumaf, pune koe plabafa tamava me roremblir.

Laitera va weda artlanir. Fuzol flaydus ko drem va int me rotunuyar. Tan *Homo erectus* ayik nokieyen dere vanludemawer. Kotlizu ayikam dilifud. Tanara va po askir. Batkane va gulaf sulem fu maed.



Welimaf gretcaks ke Combarelles arula (koe Dordogne utca koe Franca) va bata nakila rotir divrozar. *Cro-Magnon* ayik kovudad ise va bedakol onkad. Va sin van kela dem kougayantu akricu ton remay. Caesar va bate ckane kabdue Alesia malsaveter !



Kan gartolafo zarevo wetce leakom, *Neandertal* ayik va kelapa porton suxad. Tawa ke taneafe metre wan tir tapayana. Moe ludev sid tir loon bayaf numen konaku uulkorafu akricu zo rokougad. Ikse tir gadiafe !

Bate ye iksantuyune gu leltafa refema tid fixuxa. Bata kabuxa anam inieem ke okol tanameyawer nume arber.



Kela reme binca kal weda al zo rundanyar. Sulemie ba nom tauled. *Neandertal* ayik dem tilerda koe nuba iped. Mo akricu abdiegayanu gan tcabanesik, baynakiraf beicekol va int volins su kokoar.

Niaux arula (koe Pirineos rodega koe Franca) kenrone Vic-dessos ecor tigir, lente *La Vache* arula. *Madeleine* sareik moni -10000 va peya storlayana gu wexu valeve resta al kougad. Batkane va zveri gralomed.





Pirtuca ke tcabanesik

Koe talteka wali bar-saneafa decemda isu saneafa, bedakol tir leca ke tcabanera. Va « Bedakolugal » dace dile pulvit. Inafo aldo tir vas 200 kg- nume va sutkafa atela vas 100 kg- tiskar. Yambudik ke Madeleine sare va niska is barma ta epura va ervo is xeka, is va zwart is nogla ta epura va delafa gluyaxa di malsaver.

Bedakol dene govitafa milkava dem konak decemoy olkik blid ise tid wivga fakafa gu tcabanera. Tid loote dam tcabanesik ke Madeleine sare (uldinena ota tir vas cugon 500 000 ayik moe varafo tawavo ke refa Franca). Bat sulem kev niskafi tugasitasiki ik kabusiko ik feyena peya ton leca ke fikuntafa tcabanera, gilton zo gretcayar oke zo balumayar solve keve dzeta ke yunkeyena arula abictode awir. Breuil gertik va brapafa pebura ziliyir : « Bedakol jontikote tiyir isen tcabanera tiyir drikafa, batdume meka tcabanesa diolaca ta vangira fiste tiyir... ».


Volson gartol gan ayik ke Madeleine sare jontikviele zo zovdayar oke zo gretcayar ; inaf volaks vas loon bareaca ke kaatoen suleemeem paton tid, trabe loon dam okol. Tcabanesik tiyir siakraf gu po is gijarotiua ke gartol is gu stirafe kalie ke okol. Vas 1500 kg-, gartol dere tiyir tciamaf « tamef sulem ». Valey sutkaf cot, va sum kobedeyen koe ralk vas konake sanoye decitgrame tiskar, tode moekote muvugalon zo aykar. Batcoba va balikeks tori pokef fentugal tadler.

« Ke bedakol, kotcoba tior kiewafa. » Okilik va bedakol basalmar aze va norka is barma tisa donafa ugota muber. Kabdue buta, Madeleine sareikya va veyna tugadiad. Batlize rowit kane va refema abrotcafa vas 20 m- gu almaki vas 2 m- malseotat.

(Nakileem ke batu jontolafu bu va Cro-Magnon ayik kaatoer.)



Ba miel tcabanesik va bedakol basalmad. Cotafa refema vamoe teyka solzad : atela vikizeyena jontikedje di zo rovider. Barma is niska va taksul is uul is veel di tiskad. Abica veyna pu idatcol zo kabud, grewatason gu sinafa pomara !



Sulem gu lanyeyeem zo tuvlardar. Azen jivot gu yepe zo djer. Gamion baitayanon, awalkoda ko kaliafa is fentunafa ora ke soist zo levlavekar lize cadimcekon di videwer. Lan ayezok dem barma va tcalutera va vask ke wivga di nover.

Aldo ke melmakol tir vas 6 ik 10 decitor ! To inafo po nek axuca. Batlize koe weda cane fentafa *taiga* aala is rugapa poke ulidinasa kuksa, melmakol flaydur. Guazokilik ke tum gan tcabanesik su zo laiter aze ko weda zo tubumar. Ayik dadis va abrotcafä kaba arte lana tarkasa soluma kecked. Viele arti lyumara va dibla melmakol diten puskewer, pune ipeted. Idatcol va durefa durga al pezid nume vanvulted aze dere ked.



Idatcol, gire idatcol ! Jontiktode tir mekuraf pelik ke ayik. Va bedakoltum koe ruga laiter. Trakiraf tcabanesik va int divvaskad aze va eliya ke sulem tcekad, narason va bedakoloc dis va sutkaf cot.



Brova ke onasik



Baliera va sulem ta malestura tir muka ke tcabanera is onara. Larde bedakol givulter kalion lion dam termil pujer, pune batcoba tir mila wavduca tove gralomesik. Batdume remi yona decitda, zminta is niskaduul arte ridja is fruktuuul arte ridja kum inta ok edgarda is kando dem sollipasa sulga ta tcabanera lidam onara zo faveyed. Ckane pilkovafe gu onara to bak oxam *Madeleine* sare awiyid : rontaf az livaf niskaduul tutigackayan vanpid soyaci. Iriga dem toloy uul az sulgakirafa zminta toz zo zanudad.

Radimi « darigapa » ke -10000 AGJ-, inde koe Maglenose koe Danemarka rowit, vemik ke uzda is weda va gedrapafa aalinda ta askedara va ikseda ik oblaxa ik kabayikse malsaved, i va tulon dieka. Sperela ke weda va batmanyon tralt al videcker. Don onasa dona kaikion awiyisa, ayik va varafa broza milafa gu tela batugale favena dadir... kotviele rogralomen kabay wan tir ! Tazuk me zo betayad, voldum ugota : azilfem va ksewa ke ikseda ikaplekur isen azaka va niskada ke soyaci !

Kle wit da onase ckane al zo betamad, nume wan tid yalestafe ik dace diliodafe. Batcoba tir amidapafa gu tcabanese ckane dure betane is gupoane, laninde gejafamafe !

Tcabanera dere co zavzayar diliodafa lion dam conyokonara ede abdi Izvugal warzafa wivginda me zo trasiyir, i miv ayik.

Koe Pindal ceda (tigisa valente refa Espana kene Asturias gola), arestafa dzeta ranyed. Tite lana zikeyena arula kabdue Atlantika welfa, onasik va wayka adalafa gu medotolmilaf gepujek kan iriga kandoad.

(Nakileem ke batu jontolafu bu va Cro-Magnon ayik kaatoer.)



Moni -8000 AGJ-, bat onasik va « gatcexo » va kabay valeve pistaf ticuk al inked. Daljek zo ludzed aze gu koepak zo tuvillardad isen stoneem zo maltiolter. Seotana gabiyexa ben mebast vamoe kiewagickin tey zo rumkad. Lava mo intayeld kum tajda ok persa zo mimar, nekitison va jontik vikiz. Kabay di zo turodar nume gu nefta is beza zo nendoyer nume remi cadimcek di videwer.

Bate sardikye ke gola kene uzda koe Alp rodega va conyok rinder : walbuyuni dri va « digxa » zanudar isen feyen almukki va « ezaxa » tadled. Soyaci kum niskada feyenon zo titickeyed : men tid dem sulguul.



Larde voa tir mantarsafa is titsuyarsafa nume me zo rotoblar, onasik va ikseda kum ksewa batlize faved. Sina zo levlaverekad, ton remak lente salt. Kabay koniyis me rodivpujed.



Bat ayik traltiskon onad : va daljek koe soist ke Vicdessos gola kan nuba gralomed. Putcam ke daljek va epura va flet di zanudad. Katicemon koe Niaux, yambudik va daljek kev kuritca ke arula gretcayad.



Ikseda beetckoron inkeyena va voa oblad. Ironokafa ikseda va ikse buder : kabay drikon di zo narid. Koe lentefaa azeka, wida dem anamkafa kirka blidasa va onara kene weda zo inked.





Batinde diola vanbliyir

Tcabanesik va melmakol is gartol is okol is deaxelol keve dzeta ke ilsuyaфа arula zovdayad ike lingeyed ike gretcayad. Tire lanbat tcabanesik tu yambik va katoera va batyon sulem puvegud. Voxen tore sinaf grabom don telyon rotakaf, va elimaf mukot is salafa lazava dikiyid : batcoba tiyir loon dam zovdaks ok lingeks, tiyir redura va dilint sulem, tiyir favlafa is blifa zatcara ke redusa diolura. Batinde lana migva vanblir.

Koe arulapa ke Niaux koe Pirineos rodega, tcabanesik va ribiegaf gartol skuyun gan « Feliapik » ke arula mafelad. Ve koswanon, lantan va zova narir aze kan ebeltafa conyukara kum manirtel va tanoya az toloya az baroya tceka awalkolon « bakasa » va sulem zovdar. Dositik permud. Gartol zo aytar, wivga batlize tigir, gadiafa ta tcnunke. To batinde warzafa migva tir : diola va govitol zanudatas va tor al vilar.

Keve dzeta ke arula ke Rouffignac, konak melmakol zo kaatoeyed : toloy va arula kolanid, toloy ar do tanoy oc divlanid. Ban oc koe arula « kobliyir » : batcoba ware tir to diolura ! Bata migva va vuda doaled ise va lokiewafa tcabanera noved.

Kabdue balumayana krexa dem okolap koe Cap-Blanc arula, is kabdue kudjotya ke Laussel koe Beune krant (Périgord gola koe refa Franca), wirdama tid. Arse rogestat da prilara is dank is stute kabdue batyona krexa isu balumaks dilizeyed. Taneafa « wenya » dem diolafa is alkafa dandara, tite batyona kiria rotir vanbliyir.

Bat *Cro-Magnon* tcabanesik va eaftafe stute kabdue proyikeem ke grelt is yona ayikya isu sardik mopoyed. Kankum varka va int al mastud ise ton sulem al efud ise va kaba ploted. Bata nakila tir ageltodafa nekev abic grupeks noves va mana dimtadlera.



Abdi tcabanesa brinugapa, bat Neandertal ayik koe kuksa kotaifa gu varka moi xeftocek va int kolavad. Va dibla aboveed aze va alto guon storlad : nariyison va uka ke tawa, va wivga lodrikon kle di rovanlanid. Sulem va bat abigaf tisik wupesis nek tolinion lanis toz rodaxad ! Arti balem-kunda, kevulubesikiusikaf sayakik va mastus kraimolkoraf vaseem vanikatcutud : vanlanitison nek mewitinon dere int zanudad ; lan nelkotap ta tcabanera is doaliera !

Koe arula ke Toirano (koe Liguria koe refa Italia), Neandertal ayik plotes va tilerda va bat divulaf pistok su kosmad. In vas kon sulem preyutas koe izga vektackar. Gu kuritcafú fixu abovenu sol sid zo aorar. Kuritca ben pistok wan kruwer...



Gabotese ckane tir savsafe ! Kan skotcesa afida ke sumgum, bat Madeleine sareik va nuba kev pistok ke arula aykar. Va ling kum kerafa varka putcegar aze va nuba malplekur. To akoy-dara ! Ling bene dzeta zavzagir !



Neandertal guazaf ayik su awalker. Tiyir oxam balem-sandaf ! Kan zarevo ke gartol ton leakom, dositik va in do intaf imizxeem kotawad : batkane in koe kaikifa tamava wan rotcabaneter. Azon va naboxa gu raporkipi besad. Digidatol me rovodurgatad.






Selasik is tcobasik

Selaropafa ik tcobasa tegira tid abdipifa gu kotavera ke gadikye ke selaropa, i ke Ippokrates ellasar sposaf selaropik (V-eafa - IV-eafa decemda AGJ-)! Mali Aurignac sare, moni -30000 AGJ-, ayik va kurkefa pilkoda ke kurtca is varka nigrupeyer. Tire, kurtca vas blixama is vebdi dogiskir, i vas rulda tikisa va kiazasi ik onugesisa roti num malsavepena. Kolvara koe dibla tid lana teca remblisaca. Kurtca va alto sovider ise va zaxara lyumar ; dzeta ke naboxa gu varka (ruldasa vas kurtca) zo storlayad, kiren batcoba ta nendoyeran va awalkoda ke awalkik lodam malaskira va forteymiga (vaska jontiktode tir kerafa) rotiyir. Nuba buxayana gan tapera az rubiayana kev dzeta ke arula ke Gargas (koe refa Franca), ta kiazara is fraskera gu varka zo storlayad. Tod kevplekura va nuba mo pist, gatcera tir lodrikafa...

Oriafera mali bareafa decitda AGJ- zo skur ise jontiktode tcedeyer. Lana oria batugale videna koe Cluj (Romania) taneatomon zo oriafeyer, ta ape fraskera va kona oriawolga. Warzafa niskafa laumara nuvrutar da akolik di mobliyir. Voxazen igjult gin nutiyir numen toleafa oriafera poke tela taneafa zo skuyur. Numazen vedulesik gire mobliyir ! Mane deksafe tcobase ckane ! Mana bliuca ke akolik ! Kas me roguzekat da lana swavakola va oriafera co plataeyed ? Fenkuson va oriak, tcobasik rotir trakuyur da batkane va yatera ke swavaja jupayar...

Tcabanesik ke Gargas va nubeem virnon buxayan sotced. Jontiki wegri nope eaftaf tapeks al lubed. Vandilitison va kranavera is tukuvatason va onugera, « diolik » va nubeem gu varka bumber.



Kabdue arula koe talfea gola ke refa Jazaira, diolik kan fruktifi luzikasiki is poldesiki va ticesebadeem ke vedulesik kojoar. Va neki ke bata migia megrupet ! Rotir ta brostara ?




Oriafera tir gorestafa tcobara ise tici Gelkef Raporugal gilton zo sopur. Tcobasilk va kranavuta kan luzikasiki kimar. Va oria dlfur aze va anamkuri dum teli bene skunderi solimpar. Akolesik di moblir isen eepeta di onuger.

Kan fruktifa xeka tukerayana kan tey dem nubelt kum wocolbarma, fiptasik va « te » mo oria ke yikya suyon rubiar. Ticak ke taka fu zo tcalar, voxen me grupet tokenide : kas to fraskera va kranav ok kotavesa ok ziliyasa sugda ? Oria tcalayana gu bate bulafe te cugote tid ayikyafa ise koe ckant tigis valentalte Paris is aalafa azekexa koe Seine krant isu Oise zo trasiyid



Caxa ke okilik koe Sungur koe refa Moskva vema. Kela suxayana koe buxa ke Klyazma kuksa gu kerafa varka zo storlar : batcoba tir nendasa migia kiren kuritca sovider... Awalkik tiskis va kuldoyafa ingaxa do intaf imizxeem zo kotawar.





Gandura va veel

Moni -16000 AGJ- fwekkiraf veel awir. Vugtode man lipinotaf ganduks va manyona danexapa kiyir !

Tire veel va vieleafa tira di romplekuyur ise va kruldera di artowarotayar ise va ganduks di jonkayar. Banvieli vage tanion dualtanon zo diskiyir. Vas almaxa opelon plekuyuna moe epiteem niteyer. Banvielu tir asadayane. Almaxa zo belced enide va tazuk ke alto malaskickid. Apay is djim banugale zo gruped inde lan gretcaks koe Gabillou arula (koe Gironde utca ke Franca) nedir, laninde tison taneafa cavafa vola !


Belceson va konaka almaxa, bat ayik va leltafa vorpa dere askedad. Isen kotviele tuidulapayani raporki ko vorpa kotrafa gu lava zo mimar, pune lava toz lembiewer. Man kosmaks ta taneafa « burmotara »!

Voxisen koncoba loon zolonafa, vorpa noved da lava bal lanirapa ik koyara ik lamara jontikote zo rovodivburer. Ostik, tukotrayanon gu gael, kedad kup tudrikas va pujerapa.

Radistvey vorpa zo gandur, i radist tadleyen gu dre kum inta ik abrotcafa niska (kiren inta jontiktode tir riafa) lize keveon asadayana almaxa zo atced. Onatason ik ilon totatason, ayik battode rolpir. *Inuit* saneik ware tis sagaf gu radist va koyarafa eksa ko leltafa vorpa bene tota aykad. Batkane bloteem zo nendackar ise mebelxar.

Batugale, azakaf veel va bat guazapaf ganduks dunud : ugot mea tir mil voxen xeka dun tir mila.

Tite kiria ke Solutré (koe refa Franca) bate tcabanesikye va balieyen okol van pemaxo impadimad. Ayikya ta epura va asadayane vage, va almaxa di nyofad ise di tutiguad. Va gemafa leltafa refema is veyna is zwart tuplaxayan kan art faved.



Tokkane is tokinde va veel goniat ? Elega kum taneuga (tulon kona niskapa ke jaftoldunol) tir vrebafa. Bata elega kan gaba ok luzikasiki gu rontafa umicapa taneon zo kogaber. Kan gabotsa, imizinda kum niskada zo ilksantud. Ton gemapaf uul arteon zo tutigad solve ekwa gu tolfeykoraf trek (fweki) zo fer : grupay va abduak az radimak fer isen toloy feks govadjed. Tenutceria kan nirara kev yootki zo seotor.



Fera vrebafa gu askedara va veel, va redura va jontika ingasa muka dere nover. Sulemafa talga is kuldoy is niskaki vanpid skunderi. Myast ke balieyen rupol en tir djasany ke tcabanesik !



Barnugek va leftafa vorpa kum konaka asayana almaxa giskir. Bata ayikya va idulapafi dri azu ari ko lava mimar. Batkane va donafeaabre kum kladayana niska ke bedakol lembier.

Ben cewa kum inta ok megalafa niska, bat onatcabanesik va anamplekuxapa kum asadayana almaxa licekad. Batkane yasa va bagafa tota novesa va grocelafa onara di dadir. Koe Cornwall gola ke Britana is Aran ewaleem ke Eirea, onasik va manyona totinda (« curragh ») wan faved. Voxen jaftolafa asadayana almaxa gan wixastama batugale zo ikaplekuyud ! Abduxoa dun tir !





Arula is brava

Brava tir adraca ! Kotugale ayik kev plabafa tuwava va int gonendayar, is kev idulars is fentap is tizaf bwaf xeftocek, ok kev yotafa rubixa koe welfafo krimtaxo, is kev moekote suka tunoapasa va fent. Koe Olduvai koe refa Tanzania, joxara va ivamu dem raporkipi tadlesi va levak ke taneafo wico evlon gu tanoya celemda al grifuned.

Arula tir lokeskotafa tuwavafa brava kire gu suka nendoyer ise va taniafa yanka ravaldar : yanka vas san-toloya is san-aluboya eka. Kle bak anzapas idulcek feda dur isen bak fentodcek zakod dur. Voxen arula zavzar riafe gelbe, anton nobafe koe kalkaxo lize solelason va pist, lava va tuwavafa arula suxayar.

Ayafa dikiuca va arula kan vrek is raporafa feja tukiewar . Va « *tcafa arula* » dere redur, i va wico is kirka. Lana mona al zo kosuxedad nume gu suka lokiewon zo nendad ise va zijuca ke tawa belundad. Tulon to abrotcafe kotawayane intaxe ke tcabanesik ke Ukraina ok Sibira dum tele koe Timonovka.

Voxen tcabanesik va wico dile gobulud : tulon pokolanira ke bedakoltum va ilafa brinuga tuyer. Broca kum almaxa titickana bene vemiz dem kevplekuna viza wetce abdarafa brava bam zo vanmadad. Vaxede ayik va warzafa buta kosmad ! Bak ironokaf decemdatum koe Vézère krant koe Franca, mona anton tiyid acku ! Bata inafa miala vane krant zo kolnayar ; voxen bana valeve pist tigiyir.

Fentugal vanfir. Fentunafa suka va *taiga* aala suker. Ayikya va abrotcaf rontagentimaf kelor suxad. Ayikye gu drim ke cirdata celkayan kan tey, az tawa va in besad.



Australopithecus katick tcabaned. Xefto koe glupafa meila dem bumaf aaltum daktewer. Ayikya va brava nendatasa va rumeikeem ampuson vegedud. Abic drimap gu sid zo kougad. Isteon ayikya va toakirafa gama anam ayezok gamdar nume va kevsukaf vrek tazukar. Kadimeon omafo wico dem remak drume sid su zo tenuker. Kaikipon lan *Bushmen* grelt bal tcabanesa brinuga va mana nuxafa brava kolnata.

Wivgama is flavodapa ! Moe krimpa ke Boron mefta vamoe Nice koe refa Franca, bat *Pithecanthropus* katick van intafa vreda lanir, i van buta. Tec vrek kum aaldrim, buyayan gu raporki is besayan gu gama, abduion al vanmadar.



Noldot zivotcon dur. Remi konak aksat nolda va azeka besar. Idatcoltum evied ise va sumefa *taiga* aala divlanid. Tcabanesik ke *Madeleine* sare va idulafa is luedafa luva kolnid.



Nekev tigira lente ticawaltara, bata dambafa buta gu suka nendansar. *Cro-Magnon* ayik va ervo abicedje isked ise va konendasra rebava kankum elega kikaweyesa tici kiria vanmadad.



Tildera ke tcabanesik ! Koe eriltwico, ayikya va tey kiewagid ise va sumgum gestud. Kan vafi luzikasiki kum fruki, yambaf tcabanesik va melmakolafi wulaki balumar : va kon sulem fu nekir.





Ageltuafa mona

Inta is kurtca : donafa ugota ta vegedura va tawadayafa mona ke Gelkef Raporugal. Tid fakafa gu malsavera ise aultoved isen gu fent is idul is abda sostackad. Neken koe lanyono kalkaxo, ant rapor zo faver !

Aala ke mediterraneafa gola nope firdera nekina gan gleba ok kuranon vanteyana gan namulolsusik kalion zertud, i gan susik rotiskas va jotafa anga pu bonoltum. Uvoy is granta, i ligundeyen kor ke savsafa aala, va ronyofana inta adrafa gu vegedura va renta mea tiskad. Kene krimta ke Atlantika welfa, taltufa suka tid tizafa is felisa nume va atrira ke aala tatced. Batdume ant rapor zavzar rodadin ta kolnara va « rapordafa » mona.

Numazen vegeduse ckane ton zemosek di vanblir. Kalke tir kalvekackafe ; tire inafe tadle va volvaf xidaf badatum dir numen ine ton derafa pozlama tuwavon stogoyewer. Yambudik va sina tantanon moezbar, ton deraf zemosek. Tukuvatason va divtraspura ke muva, kota pozla divamon zo vodjur.

Malaskison va bate ckane, *capitelle* raporda ke mediterraneafa tamava isu *borie* isu *trulli* koe Puglia ke Italia is « *bee hive hut* » blatakkorafa raporda ke eireafa krimta. Bata wicoinda tid ranton milbavafa voxen ugota zo rodimnarid ; numen warzafo wico va kono darefo atitsuyuno kalion ikarundar. Telo losavsafa grupeno tid evlon gu IV-eafa decitda AGJ-.

Wico ke tcabanesik va melmakol ke Ukraina roneon zo kolnayar. Oria is woyail is zarevo ke melmakol ta titek zo krepkad. Talgaveem va vemiz tadled. Talteon ayikya va anamplekusa almaxa abover.




Ta vegedura va bat mona koe Morava gola koe refa Ceska, tawadayik va gerot giskis va rebava kum gama gamdayana is uskuyuna gu kuripta kougar. Ixam to zemosekafe ckane ordafe gu kuriptafa gola me ruldasa vas rapor !

To gedelaf gemelt : bate ayikye va galzajolok ke rapordafo wico rundad. Rebava kum kalkafa pozla « zemosekon » deraykayana su zo vanmadad. Fonsa kum inta pomasa va vegedura azon zo deswatad.




Bata wida dem « capitelle » raporda zo tenuker. Yambudik kan abrotcafi madasiki kum inta, va kalkafu tilmumu maliolter ise levmadar. Namulolafa almaxa moe vimava turodawed, kiren to susikafa wida tir.



Moe opafa furida wale toloya kuksa, wida koe aalaf tawaday zo kolnayar, dem ivamukorafo wico kum drim. Debak tir donaf : taya pokeon tigid, vegungafo aalxo va wivga tiskar isen onara tir rotisa.

Mek aal koe Orkney tursia tir, i koe bata tursia lente Skota. Onas vartesik ke Skara Brae moni -1500 AGJ-, nendatason gu suka, va rapordafo wico gu tawa kosuxedad. Kotcoba tir kum rapor : ilava is tinida is ponyaska is teyxo ikz-.





Yambudik ke arula

Tcabanesik va gartol va yona conyeta kev kuritca ke pistafa dzeta ke arula kan gelt conyukar milinde mo tawa ok nolda jontikedje al askir. Laizon tcabanesik va lan ralk ik lan kurd ke gartol vanmiau gojaf conyatums fokagruper ; nume va conyeta levconyar ise va konakara loplekur : balemoya xufa conyeta va inieem volad. Gartol zo zovdar, gartol zo redur !

Anamez ke pist ik tuwavaf ralk va brucka ke lan sulem poon di rodivrozad. Lana lingena ok gretcana conyeta va tuelimara va vektasuca di zanudar ! Ar tcabanesik va bat divulaf zovdaks bam diolon wid. Isen tode va sulem kaatoeyen kadimion gralomed pune inafa ewava va gevaso is bufa po di urlicker.


Kotugale yontan va kawarzera va mana ok mana teza grutecked oke grutejed.

Weti 20000 ok 10000 tanda, milcoba tiyir : tcabanesik ke Font-de-Gaume arula va kawarzera va gartol tulon tceder. Batdume vaon toz linger ise kev krexa gibelinger. Ba siel, tcabanesik ke grelt va menistki ke gartol isu keraya pu lantan tu « yambik » fu firvid.

Yambafa serna vey bata warzafa tuaptara vanblid : tela ke Lascaux isu Rouffignac isu Niaux isu Altamira (koe Espana) di tid targapafa !

Kobas yambiktum ! Pomasik va tilerda kum brimuka gid, ise va sumgum blotad, ise va kseva tugadiad. « An yambik ke Rouffignac » va krexa dem melmakol volan ton jo kev jo zovdar.

Kobas yambiktum ! Pomasik va abrotcafa tilerda kum brimuka gid ise va sumgum gestud ise va kseva egad. « An felisik ke Rouffignac » va krexa dem melmakol kaatoen ton jo keve jo zovdar.




Utoton zovdatason va bata *Covalanas* wocolya koe Cantabria gola (Espana), yambik va trigay dem imtum faver. Batcoba tir ckane ordafe gu *Perigord* sare. Lana tuwawafa yargada ke dzeta va sid volar.

Arte 1000 m- male runak koe arula ke Rouffignac, bat ayik va melmakol ko olgafe kalke gretcar. Va pist kan luzikasiki skumar. Breuil gertik tu vartaf abdiizvopik bak 1956 va bat gretcaks gu « melmakol dem facilafa ita » yoltayar.




Tcabanesik va gartol ta tcabanera fuzud. Kabdue bat gartol lingeyen keve dzeta pirdayad. Okilik va ronenuba storlayana gu kuritca vamo sulem baron kevaykar. Bata baroya koinga aykayana keve pist tir digisa sugda. Kas bata zatca va tcabanera ik rotir aytara va baroy gartol zanudatar ? Taneaf sulem ape pomatasoñ va tcabanesik zo lingeyed ike zo gretcayad. Voxen kaike diola, yambudik vanpir yambik. Va puvegura va skuranya va gretcaks ok zovdaks satoler.



Tsenteson kan nuba va pistafa dzeta ke arula plawukena gu tul-wafa kuritca, tcabanesik va intafa conyuta kosmad, i va conyuta tcalayana gan gelteem. I va conyuta dum telyona ke bedakol moe nolda ! Mana destara ! Batkane taneafa conya zo rubiad.

Azeka ke Duna bost poke Wien (Ostera). Onasik ke *Aurignac* sare va onaks ko pemaxo vanbured. Lan pak mu yambik balumas va wulakimi titir. Va vartafa « kudjotya » ke Willendorf rotir kagrupet.





Ruzadera va aalxopo

Bal darimapa ke -10000 AGJ-, lidawicka loeke tuzakodawer ise tuabdawer. Rubga koe Lentekapa anton lapter. Wexuaal is cirdata ke *taiga* aala va runda pu datafo toaalxo wale tev-saneafe laksiwake (Oslo - Sankt Petersburg) isu balem-saneafe (Bordeaux - Beograd) isked : naviula is persa is wetinga va glupafo aotcafo aalxo divlizeso male Ural rodega kale Atlantika welfa tadled. Ino tir kulafo gu wivgapa dum wocol is wafibol. Taneaf boniasik va inta kan tey is kufta saved, ise va taneafa senta wasarnad lize va midura toz voned. Va warzafa xeka vanikatcud, i va teca gaba dem jakteks cuf gu intanyofara, az va skuma is kufta solgabena sol fruktifa elegapa.

Boniasikafa wida fu tir dem anamkafa kirka dem feykoraфа kepaita. Drimkirafa istayaxa va miduxo kev alkejara ke wafibol fu nendoyed ise va taneaf bonoltum sutud : i va bulol is sperelaxof jaftol. Vakol mali -17000 AGJ- koe sibirafa aalapa zo tukwayar aze vanpiyir tciamaf gositik ta tcabanera va wocol ik wafibol is ta pomara va suera va bonoltum is lyumara ke idatcol. Gedraf rob ke bat taneaf tawadayik ke Talteka va vanlaumara ke sanelia is gedruca ke yambudafa tegira dived. Wida loote adre vanpid. Tildeteson va tawa, warzafa senta zo wasarnad ; warzafo aalxo zo anteyad numen senta sinton tere afodad... Batkane adre miduna azekapa awid, i aaliskafa azeka dum Beauce ok Ukraina lize suka turodason dun dur.

Tey va aalxo su torsar. Bat ayik va aaldrim kan kufta cuon celkad ise tuuulad. Bat nuk ko sid zo kougam nume va dzeta ke intaxe tazukad. Lotigafi intaki va vegedura va renta ke kepaita zanudad.



Senutuson va ulidinarak ok esturak, bat aalakobasik kan stuka va drim suxar. Namulol va eip albackar ; batlize va eip tigis koe mantafa donila friner. Kot kwaf ugol kum inta zo vegeduyur.



Baroya kseayana olkotcpa kum inta va dezark tadled, i va dezark impadiman gan toloy mirembayan jaftol. Loyta tir ilbodeyeni fruktipi ludzesi va tawa is bourgasi. Batcoba tir abduxoopa kiren olk conyakorun zo rofaytawar.



Aalakobasik va ebeltackaf buloloc su gralomed. Ar bulol ixam tukwayan dis va ventuyaf gem dere tir. Sin va duele malestud. Tod gilduracka, occek ke nemon govitaf bulol titir. Sinaf pustayan cot tir gedelaf.




Jontik sulem koe toaalxo viakud. Wocol aultoved, loote dam bedakol buluyus van lenteka. Wafibol dere viakud : zo laited aze zo bailed. Laitesik va buloloc kan dona gralomer. Tod direfa vartera, abdi konak aksat va wivgacka watatar.

Teyka ke tey turunkayan tite aalap vibad. Sardik va gama vanbured ise va tey kiewagid. Aal kan kufta lodrikon zo robalieter. Kufta tir vafa olkotca kum frukt dem gabexa lanibelcafa gu nubelt. Dum noelafa kufta ! Kabdueon bagalaf yambudik va balieyen granaf drim suxad. Va stuka dadid, i va fruktif imiz dem gabexa gentimrontafa gu nubelt. Va tandrimafa guema suxad.



Tukwayan dunol



Remi yona decitda, ayik va melanuca ke tcabanera levgar. Kon melmakol balieyen ok awalkeyes nope geba ok akola vanpir ageltuafو atelaxo ! Kon bedakoltum oku enekeon wocoltum va grelt remi konak viel gestud. Zavzasa atela turodanon ik vikizenon kan tey kum kusafa inta zo rovideter. Voxen balikeks adre zo pusked numen djupokosmason va warzaf govitolatum, ayik va zida fure gozemad.

Jotafa egluyusa namulolya (sulem ke katcama tid lodrikon rogralomem), ik kon pintaf namuloloc varteten gan ayik, is abic jaftoloc umbeyen gan tcbabanesik, ik kon bakayan sulem rovanlaniyin az ropeyen, rotir tid taneaf bonol ke kwaf tum ? Kas vartena is blison videtewesa wivga to tid ? Rumeik aeled : tan bonol ke milkava zo wetar lodamen ayik tcbabeneson gomallanid. Moni -6000 AGJ- koe ref Château-neuf-lès-Martigues, namulol va 40 % ke raweyana atela tiskar ; bak -III-eafa decemda baxek tir vas apu. Namulol is deaxol az jaftol ton milkavapa, va geltrafa malestusa musuca tadled. Efe tcbabanera dun zo ur : govitaf jaftol is faldol is wocol is wabol is wafibol is okol ok rayol, kare gola koe tamava, wan zo laited. Dace zo tadud kotviele rodcek va kwaf bonol xonukesir. Tuwavafa zexa va warzafa vonera va tcbabanera is tadura kotviele nekid. Izva va jontika tula divneditir.

Tukwara va dunol va zolonapafa blikabure-dopafa danexa nekitir. Milbava ke tuwava zo joar. Tulon koe gola aname Mediterranea bira, namulol is deaxol va aala vilad. Granta tisa ligundenaf kladaf ruxeem di tazukawer ; xeftof muvacek va tawa impadimad numaze kalkafa pozla zo rowid. « Rapor atrir, ~ lan tawadayik wan kalid. »

Weti tevoya decitda koe Tassili n'Ajjer fluvor, milkavapa dem jaftol dis va drorakorafa nola is kretsakiraf gem bliyid. Jaftolsusik va bonoltum kev butafa raporka linger...



Tite Saint-Loup arna katice Montpellier, bat namulolsusik ke Leke-raporugal do vakol va bonoltum suer. Inafa ladavakorafa peyapa ta ebidura is nyapera va namulolya tir leca ke inafa vartesa blira. Keve yon atcom koe granta zo balumayar.

Bata vartesikafa is tawadayikafa wida tir Windmill Hill koe Salisbury azeka koe Engla. Tir ton anamkaf tazuk vawale suyaf kelor tiskayas va fruktipi ta epura va xeka. Afoltaf baspieks va migexa tadled lize moeon gerotxa ta sura va milkava zo kolnayar. Konak vraday va kelor waljoad ise noved da susik is bonoltum mo koridxo rolanid isen midusik moe miduno wasarnxo rokobad.



Namulolsusik va bonol poke lujoromkorafe namulolxepe tiyad. Ayikya va bayna koe kuksama moe raporafu tilmupu tcater. Artan va bayna walo gelteem femur aze anam femak dem tawoldafa baltaxa biekar.



Opelapafa rujda, Rawopik va aldoxa anton katrasir, i va dri dem toloy big, ok va tawoldafa aldoxa atcesa va xuf rodafemeem. Yambudik va remayfem bene biek gamdason remplekur.





Taneaf tawadayik


Tuke tukwara va dunol dum namulol ik jaftol, vartesik va blisa wivga drikon lizukon dadir. Tuke taneafa midura, tawadayik va olegane zae isu olk poke tuvel ke kirka dadir.

Miduse ckane tir gijapaf kosmaks ; va warzackaf swavasok levaykar, i va swavasok nekin gan yona disvera sopuyuna mali konaka decitda. Ayik va govitaf webek taneon dotayar kire al katcalayar da va jontik sinkas fayam sowlerzed ; dere raveyer da bat seluyun fay va regelta ta askedara va kurfa is dibuk tiskad. Voxen abdion, obrason rindeyer ise undeyer ise vangrupeyer da bat fay taplekun ko tawa bak imwugal va gemaf kusaf werdolk is pinapafa imwa di warzeyed, i va imwa adeesa titi idulugal eke sina va warzaf olk silukon di nazbayad.


Ayik ape vofayar da fay va lo bar-sanoy taelcek sodiner abdida va warzaf nazbar ! Bat abrotcif kes nek pokoles ugal zavar ana warzaca ke tawadayafa artowara. Warzaf lum gu baroy ar va int loplekur, i lum ke ugal gu darka is soluma kal aalxo ok kuksa is aludeve ke sid donaris vas zae is fruktı.

Kirka vanpir vesk. Poke tayeem goneninten is gonendan kev vilasa talga ke namulol ik alkejara ke wafibol zo vagedur. Kalsulara va rata belkesisa va anganya ixam tir midusa kobara. Vebaltara is faytawara va belcafa kobara dined ; vesk ton wida va sint lospad.

Kan taplekusiki, tawadayikya va fay ko tawa plekur. Sumeon baroye ayikye va sid tumiltad, impadimason va gamiaf kseaks kum inta kaikvajayan gu gamatum. Talteon yikya va kuritca zanudatasva iara va trig rutuler.




Kan anamkafi dri krafolmani koe kuritcaki, bata tawoldasikya va trig tezodar ise va dzeta tutiguar. Taneaf trig tid pozkoraf kire va recia kum alma ke tcabanesik lakawarzed. Asadaks grupayenon zo milaskid.



Bat vebaltasik kan bupra valev ksent gaber ; bata ladavakorafa olkotca kum inta tir dem fruktiki dum talgeem ke prijust ke namulol. Koe savsafa misrava, « mâ » vas prijust voxis bupra belcon sugdalar ! Namulol va korid moi vebaltara di muled.

Lan krant ke Hoggar gola dem arrestafa kiria weti anyustoya decitda ! Muvara va bli ke govitaf dunol dum fuzol is beicekol is troskol turotisayar ise va rionda tukotrayar. Tawadayik va zaipa miduyud : taneaf warzeteson va regelta, ayikya va olk moe gatcewa selur. Rumeik lente sukara ilnisa va bapla, va olk kan iriga kum inta katacer. Batugale bata gola tir re letaxo...



Trig leve awalt zo turodad voxnume tid rantaf. Uricketeson va lanafa acagisuca, koe intatey zo goburmed. Goatenon gu gamaf ilavot, xelkanon zo ezzbad. Gu tawa zo besad azen tey zo turunkar. Jontik trig di empaweted.

Ta basfayara va dent, basfayasikipi moe basfayaxo zo impadimad, i azebap udanaf gu fruktif kotcatum ; kotca va bewot sollipad numaze va olk tunuyad. Batlize yambudik va basfayasaki dimempar : va fruktiki kan bweda titplatir.

Guemik mo bira




Tison yastaf gu tuwava is tiskison va olgafa is tegisa blira, ayik ke abdiizvugal wavepon ape grupujeyer. Kore dum batugale va mane kalie ik martig ape me rowokayar, pune inafa ekesuca ape tiyir gijafa. Rotrakut da *Pithecanthropus* ayik isu *Neandertal* va konak vedil dum tel ke Gibraltar isu Messina rovorem-lapiyid. Tulon kan aaldrim va int senyeson rovopomayad. Mal Tarifa vasearte Espana, afrikafa krimta monepon tigir. Opelon pujeson, Gibraltar vedil me tir meroremigan vakor.

Dadison va veel noves va sardura va zwart rem almaxa, *Madeleine* sareik va tukiewana muka epur. Leltafa vorpa va plawa vided nume va ayik gu durefa lavayega tunuyad, isen milafa vorpa deeyena gu gael ezad ise va kup rovoyordad. Batugale rumeik va adeepeyen kup kum loy ok kloya riwe milinde zanudad viele grurapujed. Weda dum siday vanpir tcabanexo. Valente Europa, tcabaneonasik va totuk kum almaxa asadayana az atceyena ben vemiz wavepon gandur. Bak 1977 Timothy Severin va Atlantika welfa kan mana leltafa witka remlapiyir !

Aalatcabanesik is tawadayik va jontika yorda don nyofara va inta isu celkara ksubed : kalion katcalayad da aaldrim sokezar. Suxason va drim, va tandrimafa guema kosmad. Onasik ke krimta ke Mediterranea bira va drim pwertackaf gu iara va guemapa me dadiyr ; ikaon va granafa stava kum edgarda zanudar, tantanon popon gluyason.

Soktara mo arestafa Vingen ewalama (Norga). Gretcason va zovdaks va totuk kev pist, guemik va conyuta icde jonvieler isked. Tcabanesik va cpogol va xo weti toloya ok baroya decitda lekeon ixam worayad.



Lapison moe toloya abrotcafa tandrimafa guema, onasik va anamplekusa donapa impadimad. Radimi tuvlardara az turodara moe mebast, kabay koe drimafo wico moe azekosap drume uzda zo videted ; bata widama tir dem gafowa. Bak -IV-eafa is -III-eafa decemda, domega ke loa uzda ke Alp rodega tid dem jontikafa sanelia. Va rob ke onara isu tcabanera isu domegafa midura isu vartera is rob ke vemafa aala beded.

Bat onasik senyes moe aaldrim va kuksa katitlapir. Dem tra is kotraf tcekak, poke Balta bira va wayka kaaneyar. To -VIII-eafa decemda tir, poke weda ke Maglemose.



Moe piluda ke Aran ewaleem ok koe Galway ceda (Eirea), onasik va riafi intaki ezason artlaniyisi tredud. Aal koe bana coyunta me tid ! Va vemiz ke totukap besatan gu jaftolafa almaxa vegedud.



Ayikya va kiewafa edgarda jontikote vestad, i va abrotcafa is vafa edgarda. Ayikye ta kopaaslera va kon drim sorlad oke ta epura va totuk belced, i va totuk dem kamadanapaf otseem. Man edgardaf tiv koe Sardegna ewala is kene Nil bost is Tcada uzda ware krulded, voxis kene Titicaca uzda ontinafa vas loon 4000 m- koe Andes rodega. Bak 1947 Thor Heyerdahl totasik va pakava ke Pacifica welfa kan edgardaf totuk remlapiyir !





Kawaxo dem frukti

Kawodik va bareaf lum felir : i va aludeve. Vartesik ke Mediterranea biragola isu midusik ke Duna bostxo va abicote frukti faved kiren kuksafi dri ta epura va kufta is stuka umote tid.

Volson aalkobasik va jontiki frukti ta gabexa ke kufta is genva iana kum bat ugot raweyad. Olgafa intanyofara va pwertafa xeka maldiner. Batdume kayestara va fruktiki kou sidwelma mea staper. Numen ayik va kela kal suyafa fruktifa bada vanmiae afoltafa bada toz suxar. Koe Spiennes koe Hainaut gola, ilsuyafa lupaxa datcon ice krant taneon zo fenkud lize fruktifa bada makewed. Voxel kotviele tid titsuyarsafa, pune wupesid ; batdume kawodik va lird mal azekexa kal fruktifa bada toz titsuxad : batcoba tir kosmaracka va « drekobara »!

Dugajafi frukti zo ikudar numen « litcanya » anton zo kosaved : kawodik kal aludeve vas 15 m- (ontine ke alubvegemaf lipok) titlanid. Kotviele afolt tir olgaf, pune suxara tir kan skuma kum frukti ; arviele tir mildaf, pune kan skuma kum wocolarma. Lanlize loa 1500 skuma koe tanoy lird zo trasiyid ! Kotviele lupaxa zo tuabrotcad slikeke toz wupesid, pune warzaf lird zo titsuxar. Koe Grime's Graves (Engla), mon 400 lird ton polku zo otayad. Jovlen lird gu baspieks ke kon warzaf moion zo adoner ; batkane xonukesisa kikawera zo taruted. Koe Hainaut gola, lan lird titsuxayan bak -3390 bak -3270 AGJ- zo pieyer ; acum remi 120 tanda zo saveyer !

« To donaf spert ke frukti, ~ pradjokilik pu parloesik nukalir. » Datcon ice lan krant ke Hainaut gola, fruktifa bada makewed. Kawodik va lupaxa ilsuxad.




Yasafo kawafo savexo moe azekexa ke Oise gola. Uzesison va titsuyafa bada dem frukti, toloy kawodik va lird titsuxad. Kal aludeve vas loon 15 m-, rotir. Vrek giskin gan balemoy gerot gu muva is awalt nendar.

Koe Norfolk gola (vagerone Engla), lird ke -III-eafa decitda isu -II-eafa tid lomantaf : xakola vas 5 m- koe Grime's Graves. Abrotcaf bil ok bigkiraф persadrim zo faved. Kon kawodik gloder, batcoba tir tana taneafa kobarawalta.



Jontik lird ke -IV-eafa decitda isu -III-eafa tid xakolaf vas 80 cm-. Kawodik altogison dum meftavutiusik titlanid ise ticlanid. Bil me tir adraf. Eruilt dem frukti kan wazdel zo ticbure.

Afianon gan puntagum, soli va omapafa lupaxa suxar. Skumasik va fruktiki griksantur edje pomasik kadimon divbulur. Bata portafa kobara koe vafa afolatafa gopa zo ksuber. Fruktigakola tisa kawodikafa akola ixam ernigur...



« Witafa » kawoda. Abrotcafa lupaxa intaxeyena gu drim koe meftava vanludemawed. Toloy kawodik va gamiaf vaj dem eip moe ksid divbulud. Sideip vas mordarapa sareon gu Hallstatt (taneaf azilugal moni -900 AGJ-) mukar.





Raporey is ckant is kepaitakiraf gaest

Mali 50 000 tanda, ayik va awalkik koe arula bravar tote gola vason ruldar. Moni -IV-eafa decemda, onamidusik koe refa Breiza is sulemsusik ke Causses gola jontikote tid ise ton gijarotif grelt va sint grustad ise va gracafa arula vegedud : to « raporeyafa » arula tid, kolnayana kum raporki vas 20 ik 40 decitor ok loon. Lantode abic opelaf swalot (raporey) zo kouгад. Tode besasu tilmu moe toloy swalot ton uwedjela zo inked, pune ckant zo tazukar, i cugexafi tuveli bravasi va awalkik. Konaka uwedjela keveon rundayana va « kepaitakiraf gaest » tadled.

Loeke grelt tir gijarotif numen loeke okilik zo payur, isen loon ponkik va cugexa bagaliafa gu in djukolnad (moekote viele payun okilik bak blira volmiv vegedur !). Acum ageltucafa « raporeyafa vulnera » zo kabudar. Konaka woda va granafo aldo ke batyon vegeduks num maldineyena askifoara kramon rietad.

Aldo ke besasu tilmu ke ckant koe La-Ferté-Bernard isu Bagneux isu Saint-Fort-sur-le-Né isu La-Frébouchère kottanon tir vas 90 decitor isu 85 isu 70 isu 60. Aldo ke raporey ke Gozé (Hainaut koe Belga) dace tir vas 25 decitor.

Kepaitafu tilmu ke Saint-Fort-sur-le-Né, koe lano raporxo tigiso arte bar-sanoye decitmetre zo iliksantuyur. Lum ke raporeyap ke Locmariaquer (Morbihan koe Franca) arbeyen gan gleba tiyir vas 20.40 m- isen aldo vas 348 decitor. Impadimatason va in, 1750 ayik ok 250 jaftolye tiyid adrafe. Kolhatason va batyona cugexa, nivafi tari koxutackani is dirgani gan « okilik ke pradja » remi yon abrotcif aksat oku tanda ape kuncayad.

Kan zatca ik puda, okilik ke pradja va tiura dirgar : nenera va raporeyap mo tickelda ; kiazara va volsafa otsa kan yon matek ; pastara va granafi raporki ko kela ton rotisa loxufa tirka.




Tcarmapa gjifa dum venta poke bira zo kolnar. Viaf dodelikaf ezgalday va tawa is dri ton ksidcekap dagimar, kabdue vegedus blodik patackas va skuyuna kobara. Lum ke Saint-Michel tcarma koe Carnac (Breiza) tir abrotcaf vas 115 m- is mantaf vas 58 m- is ontinaf vas 10 m-, isen inafa vegedura va kobara ke 400 ayik remi icle tanoya tanda dineyer. Vegedutuson va naboxa ke wideytaf ok alkaf okilapik, konaka wida va intaf kobasikeem kabelcad. Numen banugale grustaksap ape krulder.

Va bata caxafa fipta koe abrotcafa kepaitakirafa lupaxa ke Mané Rethual koe Locmariaquer (Breiza) fakon rogestit. Mana raporeya fa cugexa tir naboxa mu belcon okilik is inaf yasik iku yastik : nume tir donafa.



Anambeckeyen raporey moo drimvraday zo nener. Ironokaf drim re kadimeon tigis kabduon vere zo rundad. Tilmu ke ckant ke Proleek lente Dublin (koe Eirea) vas 40 decitor va lo 200 ayik ta arplekura dineyer.



Gamiafu tilmu kan madasiki zo levmadar. Takrelaf is obliif dositik va yaxasi raporki rundar, i raporki giskisi vwon ice lane ontine is tufakasi va arplekura. Va burgiki al narar kiren koni kalkafi raporki co zo selur.



Swala kougayana gu sid is yaxayana kan raporki re tid rundackayana. Pieyena tickelda kale ontinuk zo vegedur. Ayik va besasu tilmu vamo swala kan laday impad ise kan madasiki platid. Tilmu nope aldo fu rundawer.





Vegeduropik va ctake

Vegedusik djastas is megas va zatca va logranafa elega tazukatasa va levak ke kolnatasa cugexa taneon kabelcar ; batkane me goticburer. Azon va lopinafa is ronubana elega krepkar. Bam vanpir vegeduropik ! Mali -IV-eafa decemda, vegedusik dere vanpir « rapordivgabesik »; va rapor kare veyadafe ckane celkar, i kare veyada kazawatasa va intasimba. Jontiktode tuazentara va welma ke raporki is tenutcer a skuyuna kan bweda va kota conyuta ke veyada al vilad. Raporey ke Kerloas-en-Plouarzel va toloya volsafa ralka vider ; sina tid nenes istok zanudas va modemara va wazdel is nenera va elega.

Raporeyafu ivamu ke Stonehenge (Engla) zo vodjuyud enide awalt Lyon ice cugexa ba idulugalafi volegaki ticawaltar. Koe Eirea, tcarma ke New Grange vas abrotcaf a lupaxa stasa kal caxafa mawa ruldar, i kal istefa mawa zemosekon galzayana.

Ba fentugalafi volegaki, ba kot tol-saneaf viel ke santoleaksat, bata mawa gan awaltafi afi remi 17 wexa wali 8 b- 58 is 9 b- 15 zo koafir. Vegeduropik dere tiyir kocopik ! New Grange va dopewa ke Ramses II koe Abu Simbel koe Misra obar, i va dopewa suxayana koe kiria is milinde vodjuyuna... arti kaikion 1200 tanda. Ara vegeduropafa sega : mawa ke ckant ke Antequerra. Inaf lum tir abrotcaf vas 24 m- is mantaf vas 6.50 m- is ontinaf vas 3.30 m- (welma vas 160 m²). Cugexa vas 31 raporki anton ruldar ; aldo ke ludevafu tilmu nivon tir vas 320 decitor. Kotafo aldo ke cugexa tir vas 1600 decitor.

To idulugalafi volegaki koe Stonehenge koe Salisbury azeka (Engla) tir. Vawale cugexafu ivamu, awaltara koe lya ke logijafa barraporka ticstir. Sielon, tey zo turunkad...



Barraporka ke Stonehenge ! Swalot vas 50 decitor va istok moe moak dadid. Uwedjela tid suxafa gu veyada blonjatana ontinon ice 8 metre. Ticniso pexo ta aykara al zo senud.



Celkatason va bata pwertarsafa elega, raporilbodesik va yona vanconyana veyada kan istorafi poldesiki suxar. Ko kota, va simba kum inta kan bwedapa titplatir. Ayikya va simbeem adeetes moion rustoler numazen pist ludzewer.

Raporek ke Barnenez-Plouezoch (Breiza, Franca) tir tan logijaf ke Europa. Bata raporafa flavapa gan yona rebava abrotcafa vas 85 m- is mantafa vas 35 m- is ontinafa vas 8 m- koeon zo giskir. Koak vas sanoya caxafa mawa don anyustoya kum raporki is zemosekon galzayana ruldar. Bat raporek tir evlaf gu IV-eafa decitda aze vanpiyir raporxo. Neditison va dre, yunkesik va in ligundeweyes al zovdar, i va in ba giwara.



Kabdue jontolafa resta ke Antequerra, i kabdue « logamiafa cugexa ke tamava », varaf wid va intaf okilikye is dositikya djuprokotawar. Dum misrafa naboxapa, yupxo di zo elakeyer numen meka rawopapa xa zo trasiyir.





Ayik ke lut az iyekot az azil

Isti -III-eafa decemda, warzaf ugot koe talteka awid. Tid olgaf is elkaf nume, tulon tazukatason va kufta, medrikon zo romyelgad ; neke tre myelgara ton toaz zo tutiguad. Bat ugot tid moava is lut ise ton nazbokaf sok zo malsaved.

Ckane ke jera va batyon taneaf ugot moni -6000 / -5000 koe roneka ape zo grupeyer. Kawot gu cadeka tuidulayana kan inta zo komimad aze koe cupasiki yankon gu 1100° eka zo aynad. Voxen lutafa kufta kalion solamewer. Wori aotceson va jen lut gu ar kawot dum dig koe Anatola ok vopel koe talteka, va lodolgafa num logabesa yanta seotat. Viele ayik kosmar da vangluyaksafa pona ke iyekot tir vas sanoy pak dem lut sotre tanoy dem vopel, pune va torigiraf kosmaks tugelrar.

Danexa tid granafa is jontikafa : taneon imizxa (kufta is nubema ikz-) kum yanta zo iad, i kum iyekot az mali voltaneafa decemda kum azil. Azon siluk ke xeka...

Kawot zo ikseltad ; aneyatason va vopel ko Cornwall gola (Engla), guemastasik va Manche bira exuled. Milugale okol zo tukwar isen krafol zo gandur aze zo galbur ; va anamucklesiko ke tawoldopik is lima ke tawadayik di rabander.

Abdiizva nope lana eroyaфа tukaliawera keni yona zolonafa vilara tenukewer. Tire, aala tiyir kosapafa gu abdiizvugal, balieyena gan kufta ke vartesik is tawamidisik is yambudik.

To kono yantanyofaxo koe Anatola titi Iyekotugal (-II-eafa decemda), Ontinafa cadeka (vas 2 m-) kan inta zo tuidulad ise va rilaf kawot zo tukotrad. Aynas okilik va divtraspura ke yanta eninter.



Lut is iyekot ta iara va kufta is nubema runion zo balikeyed. Yootafi cupasiki ilbodeyeni kan raporafa sadja va xeka suxon kawarzed. Tec pezom (gaelasa stita) nover da tie bak aynara rodivcadelkawed.

Moi tufentara va yanta, kufta zo divcupar. Inafa gabexa kan nirara kev yootki zo tucuynar. Traspuk is sulga ke nubema mo kreyta zo myelgad aze zo tunirad. Prostewafe ckane ke rapor tenuketeson wan zo faved.



Koe Merveilles krant tite Bégo mefta, bat namulolsusik va taka ke nolakiraf jaftoldunol ke intafa milkava kev keraf fwek gretcar. Va iyekotafa nubema dere regrar aze va welma kan istoraki puiledar.



Jesik va kuritcafa vuka kotaifa gu delaplawesa yanta kan toloya viza kum inta vannarir aze va cupasiki tukotrar. Kufta wal toloy lik ke cupasiki zo aynar numaze vas abrotcaf yantaf traspuk bene zokeveks ruldar. Rucara di griawisir.

Pisusik va imizxa is iyekotxa bures va vajap zo koskayad. Voxen iyekotafa tceka va cot lodolgon dam frukti sollipad. Xango ploteno gan pisus okilik tir crakepafo loon dam raporafa kufta...



Mali wida kali ralma

Remi baroya decemda, wali -5000 is -3000 AGJ-, sanelia ke coyunta titisa Gallia male ota vas 500 000 irubasik kale alub-celemoy towar. Sanelia ke Tawava dere jonsanawer, kale 300 decemoy irubasik. Wida zo jonkad ise loloon tuzolonawed. Grustara tuadrawer. Hautes-Bruyères furida wale Seine bost is Bièvre kuksa xanton gu Paris, vas abica anamkafa kirka is tanoye rontagentimafe intaxepe oxam ruldar, voxen Windmill Hill wida va ivamufo lizuxo vanikatcur ; anamef kelor zo suxar. Kaikion, widam ke Biskupin ewalama (Polska) kare mil zovdom zo vegedur ; va intyona mona vanconyar ise va ageltucafa is vafa migexa anameon vanmadar.

Jonkaweson, wida gu truminda zo broed : kelor is nuku is gijarotifa migexa, pitcas rasek is rolizina za ikz-; ostik moe furida ok kesi ok ewala kre zo kolnad. Vegeduropik vanpid gejopik : Dun Aegus folk icdeon tir akoydas.

Wida licawed, ta lokiewafa rojura, va runda leon kereled, taya is baspexo divlzewed. Tawaxo fakafo gu nyofara jontikedje zo midud. Aalxo dun illaumapad. Taya zo griuziackad isen pilkotik lickon anamsud. Sawsafe sare dem wida is tawek mesolwif gu tazuk is meelimaf gu kima mea tir : banugale mekimafa darka kruldeyer nume gan kottan zo rotupilkayar ! Batugale, memusuca dun abdufir. Batdume yanta (nelkon azil) va iara va dug lodam dezarkloyta zanudad. To mana vamoeucapa ke digisik va azilafa kaba oku dug tove tawadayik ok vartesik anton dadis va peya !

Dilfura va « crannog » Craggaunowen eireafa ralmawida (Clare gola) tisa folkayenafa wida ke Azilugal is kolhayana moe trumin-dakirafa ewalama. Ruzadesik tid lokiewon ervokiraf isu rojuxakiraf ise va Engla artulapid. Izva tir kadimifa.





Vegeduna wida moe domega ke Neuchâtel uzda (Swiza). Pietetson is tudelatason va doma, edava dem kotraf krafol va tawa is ye dagimad. Azekos titis va levek ke warzafa wida, koe weda zo vegedur. Rigotc va gamiaifi raporki yezvasi va nuk numu kougasikal acaf sid levburer. Rontagentimafa intaxa kare vun zovdom dem nudacka fu zo kolnad. Bata mona vas toloya olkoba giruldad.

Begcade kseayane kum kuritca moe raporaf titek dive mona zo vegedur. Fird tid nobaf koe uzdfa wida. Lana dimjoara skuyuna moe Konstanz uzda gan tey weti konaka tanda zo vilayar.

Aname Dun Aengus folk koe Aran ewaleem, arte zobexe ke poxara male migexa, azavzatason va ruzadesik, zuvda dem mederafi raporkipi zo inkeyer. Batcoba va waleknuktum ke romik kabdue Alesia ok witaf kevbortaf lirk larbunar.



Ewalamo ke Biskupin koe Polska mali Gelkeraporugal zo kereleyer. Bak -VI-eafa decemda, wid kotunon grustan zo vegedur. Vakenefa nuda va abrotcafa intaxapa griuijad. Bedom kevtite migexapa anamlicar. Onas tawadayik va yultava dem walekayan persaf trink tukotrayana gu tawa is tigisa tite nuku. Tite migexa, tuuulayan nuk bramon kougayan gu runta ke uzda is ruzadesik nendad.



Blira sareon gu Abdiizvugal...

1. Xeka va ayik towasir
2. Kaba kum inta is brind kum frukti
3. Tey ke kelt
4. Levrotira va tey
5. Rob ke tuwava
6. Sulem iksen
7. Pirtuca ke tcabanesik
8. Brova ke onasik
9. Batinde diola vanbliyir
10. Selasik is tcobasik
11. Gandura va veel
12. Arula is brava
13. Ageltuafa mona
14. Yambudik ke arula
15. Ruzadera va aalxopo
16. Tukwayan dunol
17. Taneaf tawadayik
18. Guemik mo bira
19. Kawaxo dem frukti
20. Raporey is ckant is kepaitakiraf gaest
21. Vegeduropik va ctake
22. Ayik ke lut az iyekot az azil
23. Mali wida kali ralma